


ՀԱՂՈՐԴՈՒՄՆԵՐ

Ս. ՊԱՆԴԱԼԵՈՆԻ (ՊԱՆՏԱՂԻՈՆ) ԱՆՈՒԱՆ ՅԻՇԱՏԱԿՄԱՄԲ ՆՈՐԱՅԱՅՏ ՎԻՄԱԳԻՐ ՏԱԹԵԻԻ ՎԱՆՔԻՑ (895Թ.)

ԱՐՍԷՆ ՅԱՐՈՒԹԻՒՆԵԱՆ
ars.vimagraget@gmail.com

Միջնադարեան Հայաստանի հոգեւոր ու կրթամշակութային նշանաւոր կենտրոններից է Տաթևի վանական համալիրը (Ս. Եւստաթի ուխտ), որը գտնուում է համանուն գիւղի հարաւարեւելեան կողմում՝ անդնդախոր ձորի պոնկին: Դեռեւս վաղ միջնադարում հիմնադրուած վանքը ծաղկում է ապրել Թ. դարավերջից. 895ին սկսուել է գլխաւոր Ս. Պօղոս-Պետրոս եկեղեցու կառուցումը: Այդ մասին է վկայում տաճարի արեւմտեան որմի հարաւային կողմում՝ արտաքուստ պահպանուած շինարարական կիսաեղծ արձանագրութիւնը՝ 6 տողից՝



...[ՅԻ]Ր. (895) [ՀԱՅ]ՈՅ ԹՈՒԱԿԱՆՍ
...ՐԻՍ ՆԱԿԱՍԱՐԴԻ :Դ: [4]
... ՅՈՎԱՆԷՍԻ ՍԻՒՆԵԱՅ ԵՊԻՍ
[ԿՈՊՈՍԻ], ՈՐ ՅԵՏ ՏՆ ՍՈՂՈՄՈՆԻԿ
[ԱՐԳԵՅԱՅ], ՍԿԻԶԲՆԱՐԱՐԱՔ ՇԻՆԱԾ
ՈՅՍՊ


Արձանագրութիւնն առաջինը վկայակոչել է Սիւնեաց մետրոպոլիտ, պատմագիր Ստեփանոս Արք. Օրբելեանը, ով թէպէտ պահպանել է վիմագրի բովանդակութիւնը, սակայն շարադրել է իւրովի³: *Դիւան Հայ Վիմագրութեան* Սիւնիքի համապատասխան պրակը կազմելիս՝ յիշեալ իրողութիւնը նկատել է նաեւ Սեդրակ Բարխուդարեանը, սակայն վիմագրի մասնակի եղծուած լինելը հաշուի առնելով՝ նա հաւատարիմ է մնացել Օրբելեանի վերծանութեանը: Արժեւորելով արձանագրութեան կարեւորութիւնն իբրեւ Տաթևի Վանքի պատմութեան վաղագոյն ու հաւաստի սկզբնաղբիւր՝ մենք փորձել ենք վերջերս արուած լուսանկարի հիմամբ նորովի ստանալ վիմագրի գրչանկարը⁴՝ դրանով իսկ առաւել ճշգրիտ վերծանութիւն դնելով գիտական շրջանառութեան մէջ:

Վերոյիշեալ վիմագրին աջից կից է միաժամանակ գրուած մէկ ուրիշը, որը, բարեբախտաբար, լաւ է պահպանուել: Բարխուդարեանն այն վերագրում է գաւազանի կամ «ճոճուող» սեան կառուցմանը: Վիմագիրը գետնեղուած է առանձին քարին. 7 տող (նկ. 1բ):

Անվիճելի է, որ խօսքը վերաբերում է ինչ-որ կոթողի, սեան, արձանի կանգնեցմանը, որը տեղի է ունեցել «Ի ՆՈՅՆ ՏԱՐԻՈՋ», այսինքն՝ նախորդ արձանագրության մեջ վկայուած ՅԽԴ (895) թուականին: Հետեւելով Բարխուդարեանին՝ պետք է հաստատենք, որ վիմագիրն, ըստ ամենայնի, Տաթևի գաւազան-սեան շինարարական վկայագիրն է, որը տառաձեւերի հնագրական առանձնայատկութիւններով Թ. դարի վիմագրութեան դասական օրինակներից է: Գաւազան-սեան կառուցումը յիշատակում է դեռեւս Օրբէլեանը, որն ի մասնաւորի նշում է, թէ եկեղեցու աւարտից յետոյ «...զամս մեդրասան՝ կանգնէ եւ մերձ եկեղեցւոյն հանդէպ դրանն հարաւոյ սիւն մի զարմանալի յանուն սրբոյ Երրորդութեանն ի մանր քարանց պալտուածեալ ի չափ 30 կանգնոյ»⁵: Այսու, համաձայն Օրբէլեանի՝ սիւնը կանգնեցուել է 906ին եւ կոչուել Ս. Երրորդութիւն:

ՏՐԱՄԱՆԱԻ ԱԾԱՊԱՀ
ՏԵՐԱՆՅԵԻ ՅԱԻԺԱՐՈՒ
ԹԵԱՆԲԻՄՈՅԿՐԱԲՆ
ԱԻՈՐԱՅԵԻ ՆՈՅՆ ՏԱ
ՐԻՈՋ Ի ՅԵԻԹՆԵՐՈՐԴ
ԱՄՍՈՅՍ ՅԱՐԱՅ ԿԱ
ՆԿՆԵՑԱԻ ԱՐՁԱՆՍ

ՀՐԱՄԱՆԱԻ ԱԾԱՊԱՀ
ՏԵՐԱՆՅ ԵԻ ՅԱԻԺԱՐՈՒ
ԹԵԱՆԲ ԻՄՈՅ ԿՐԱԲՆ
ԱԻՈՐԱՅ ԵԻ Ի ՆՈՅՆ ՏԱ
ՐԻՈՋ Ի ՅԵԻԹՆԵՐՈՐԴ
ԱՄՍՈՅՍ ՅԱՐԱՅ ԿԱ
ՆԿՆԵՑԱԻ ԱՐՁԱՆՍ⁶



Նկ. 1 ա, բ Տաթևի վաղագոյն արձանագրութիւնները, Թ.-Ժ. դդ.

Դառնալով սոյն յօդուածի խնդրոյ առարկայ նորայայտ արձանագրութեանը՝ նշենք, որ այն որմնասեան պատուանդան յիշեցնող մի քառանիստ բեկորի երկու նիստերին է (նկ. 2 ա, բ): Առաջին հայեացքից այն ինչ-որ սեան, կոթողի մաս է, միգուցէ դրա վերին կամ ստորին հատուածը՝ բաղկացած քառանիստ սիւնից ու ոճաւորուած գնդից (բարձ.՝ 0,67 մ., լայն. ճակատային մասում՝ 0,38 մ., կողքից՝ 0,24 մ.): Դատելով քարի մշակումից՝ սեան լայն նիստերից մէկը կից է եղել պատին, իսկ միւս երեքը՝ բաց, որոնցից դիմային ու ձախակողմեան նիստերին փորագրուած է արձանագրութիւնը: Կոթողը նախապէս դրուած էր Ս. Պօղոս-Պետրոս

եկեղեցու արեւմտեան պատի հարաւային անկիւնում՝ անմիջապէս վերոնշեալ արձանագրութիւնների տակ: Քանի որ տուեալ տեղանքը 2015ի հնագիտական պեղումների ծրագրով նախատեսուած էր պեղել⁷, նպատակայարմար գտանք քարը տեղափոխել ապահով վայր, որի ընթացքում էլ ընդօրինակեցինք ուշագրաւ արձանագրութիւնը՝ դիմային մասում՝ 4, իսկ ձախ կողմում՝ 5 տողից.



ԿԱՆ[ԳՆ] ԵՅԱԻ Ս[ՈՒ]
ՐԲ ՊԱՆՏԱՂԻՈ
Ն Ի ՁԵՌՆ ԳԻՈՐ
[Գ] ՀԱԶԱՐ
Ա[Ր]Պ[ԵՏԻՆ]

Նկ. 2ա

Վիմագիրն ըստ հնագրութեան՝ Տաթևի վաղագոյն արձանագրութիւնների ժամանակակիցն է, այսինքն՝ աներկբայ կարող ենք թուագրել Թ.-Ժ. դդ.: Համաձայն վիմագրի՝ Գիորգը, որն իրեն «հազարապետ» ու «նուաստ կրանաւոր» է բնորոշում, Ս. Պանդալեոնի (վիմագրում՝ Պանտաղիոն) անունով կոթող է կանգնեցրել: Նկատենք, որ *Պանդալեոն-Պանտաղիոն* բառում մենք գործ ունենք գրաբարեան լ-դ ձայնորդ հնչիւնների արտասանութեան ու գրութեան երկակիութեան հետ, ինչը պայմանաւորուած էր գրաբարի վաղագոյն փուլում՝ նշուած ձայնորդների գրեթէ նոյնական լինելով: Վիմագրագէտ Սուրէն Աագեանը փաստում է, որ դրանց գործառութային երկակի վիճակը շարունակուել է մինչեւ Ը. դարը. «... երբ պարմական հնչիւնափոխութեամբ այդ հնչիւնների որակական ընդհանրութիւնը նուազում է եւ նրանք զգալի չափով հեռանում են իրարից»⁸: Նա յաւելում է, որ լ-դ ձայնորդներն արտայայտող գրերի գրաբարեան կիրառութիւնները շարունակուել են նաեւ յետագայ դարերում, սակայն. «... հետեւելով ոչ թէ կենդանի արտասանութեանը, այլ դասական գրաբարի ուղղագրութեանը, այսինքն՝ Թ. դարից յետոյ դ հնչիւնը այլեւս լ-ի նման առաջնալեզուային ձայնորդ չէր, այլ երնալեզուային ձայնեղ բաղաձայն, սակայն գրութեան մէջ դեռ աւանդոյթի ուժով շարունակւում էին այդ հնչիւնների նոյնացման կամ իրար փոխարէն գրելու դէպքերը»⁹:



ՅԻՇԵՄ ԲՍ
ԱԾ ԶԳԻ
ՈՐԳՆ ՈՒ
ԱՍՏ ԿՐԱ
[ԻՆԱ]ԻՈՐ:

*Նկ. 2բ Ս. Պանդալեոնի
անուանակիր կոթողը կամ
որմնասեան
պատրուանդանը*

Դառնալով վիմագրում յիշատակուած Գիորգի «հազարապետ» պաշտօնին՝ նշենք, որ բառարաններում այն ստուգաբանում է իբրեւ զինուորական պաշտօնեայ՝ հազարի պետ, արքունի գործակալ, վերահսկիչ, տնտես իմաստներով¹⁰: Նշուած վերջին պաշտօնները կարող էին գործածուել նաեւ հոգեւոր ոլորտում՝ նոյնանալով վանքի տնտեսութեան սպասաւորների զբաղեցրած տարաբնոյթ պաշտօնների հետ. կարծում ենք՝ վիմագիրն ասուածի վառ օրինակն է: Տաթևի գաւիթ-սրահի վիմագրերից մէկում յիշատակուած է ոմն Գէորգ աշխատաւոր. ԶՀԱՅՐ ԳԷՈՐԳ ԱՇԽԱՏԱԻՈՐ ՏԱՆՍ ՅԻՇ/ԵՑԷՔ Ի ՔՍ¹¹: Դատելով արձանագրութեան բովանդակութիւնից՝ Հայր Գէորգը վանքի սպասաւորներից է (աշխատաւոր) կամ մասնակցել է 1043ին կառուցուող սրահի աշխատանքներին:


Յայտնի փաստ է, որ առանձին կոթողներ անուանակոչուել են տարբեր սրբերի անուններով: Այս երեւոյթն առաւել ցայտուն է խաչքարերի օրինակով, երբ ըստ վիմագրերի՝ դրանք կերտուել ու կանգնեցուել են այս կամ այն սրբի անունով՝ երբեմն կրելով նաեւ սրբի պատկերագրութեանը համապատասխան յօրինուածք (ներկայումս Էջմիածնում ծագումով Յովհաննավանքից 1171ի թեւաւոր խաչքարը՝ Ս. Պողոս-Պետրոս առաքելայների, Հաւուց Թադի ԺԳ. դարի խաչքարը՝ Ս. Սարգսի, Հաղբատ Գիւղի 1273ի խաչքարը՝ Յովհաննէս Աւետարանչի անուններով են.)¹²: Համլէտ Պետրոսեանն առանձնացնում է անուանակոչութեան դէպքեր, երբ խաչքար կանգնեցնողը նրան տալիս էր իր անուանակից սրբի անունը. օրինակ՝ Հերիերի 1383ի Ս. Ստեփանոս խաչքարի կանգնեցնողն ըստ վիմագրի՝ Ստեփանոս արեղան է¹³: Համանման է նաեւ պատարագների յատկացման երեւոյթը, երբ նուիրատուն ակնկալել է պատարագներ ստանալ իր անուանակից սրբի յիշատակութեան օրը: Ինչ վերաբերում է մեր կողմից քննուող կոթող-պատրուանդանին, ապա չնայած նրան, որ Հրաչեայ Աճառեանը քանիցս

«Պանտալեոն» անձնանունը ստուգաբանում է¹⁴, այդուհանդերձ վիմագրում երկիցս վկայում է Գիորգի անունը, հետեաբար, կոթողը կանգնեցուել է սրբի ոչ անուանակից անձի կողմից, բայց եւ՝ տուեալ սրբի անունով:

«Սուրբ Պանտաղիոն» անունով յայտնի է համաքրիստոնէական սուրբ Նիկոմիդացի բժիշկ Պանդալեոնը¹⁵, յայտնի նաեւ՝ Պանդալեոն, Պանտալեոն անուանաձեւերով (մօտ 275-305 թթ.): Նրա վարքն իր «ուսուցչապետ» Երմողայոս քահանայի հետ մտել է Յայսմատուրքի մէջ՝ «Վկայաբանութիւն Սրբոյն Երմողեայ քահանային եւ Պանտալեոնի Բժշկին. Հրոպից Ի. եւ Յովսիս ԻԶ.» խորագրով¹⁶: Պանդալեոնը Նիկոմեդիա (այժմ՝ Իզմիթ, Թուրքիայի կազմում) քաղաքից էր, որի հայր Ստորոդիոսը դեռեւս պատանի Պանդալեոնին ուղարկել էր Եփրոսինոս ճարտար բժշկապետի մօտ՝ բժշկութեան արուեստը սովորելու: Պանդալեոնին վիճակուած էր ոչ միայն հմուտ բժիշկ դառնալ, այլեւ Ս. Երմողայոս քահանայի միջոցով քրիստոնէութեան վարդապետութիւնը սերտել: Յայսմատուրքում նշում է, թէ ինչպէս է Պանդալեոնը Երմողայոսին ունկնդրելուց յետոյ կենդանացրել օձի խայթոցից մահացած պատանուն. «Եւ ի ճանապարհին երես պատանի մի մեռեալ ի հարուածոյ օձի եւ դեռեւս անդ էր օձն մերձ տղային: Յիշեաց զքան Սուրբ ծերունոյն Երմողայոսի եւ անուանեաց զՅիսուս Քրիստոս ի վերայ մեռելոյն եւ առ ժամայն յարեաւ մեռեալն եւ օձն հերձեալ սափակեցաւ»¹⁷: Յիշեալ դէպքից յետոյ Երմողայոսը Պանդալեոնին մկրտում է «ի Քրիստոս հաւատացեալ»: Սուրբ նշանի կամ խաչի զօրութեամբ նա բժշկում է «... ի կաղս եւ ի կոյրս եւ յամենայն ցաւագարս եւ ի դիւահարս եւ զամենայն ցաւս ի մարդկանէ փարարէր»¹⁸: Երմողայոսի եւ Պանդալեոնի դաւանած քրիստոնէութեան ուսմունքը տարածում է ողջ երկրում, ինչը յարուցում է հեթանոս Մաքսիմիանոս կայսեր զայրոյթը: Վերջինս գլխատել է տալիս նախ Երմողայոսին ու նրա երկու ընկերներին, ապա՝ Պանդալեոնին, որի պարանոցից. «... փոխանակ արեանն կաթն բխեաց եւ ջուր: Եւ սուրն ծալեցաւ որպէս մոմ եւ փայտ անւոյն արմատացաւ եւ եղեւ ձիթենի պտղալից»¹⁹: Բարձրեալը նրան օժտում է որպէս փարատիչ ամենայն ցաւի եւ անուանակոչում ոչ թէ Պանտալեոն, որ նշանակում է ամենաոխիւ, այլ Պանտալէիմոն, որ է՝ ամենողորմ. «... զի բազումք յանուանէդ քումմէ՝ ողորմութիւն գրցեն եւ ցաւոց առողջութիւն»²⁰:

Մեզ յայտնի չէ այս սրբի անուանակիր կոթողներ հայ իրականութեան մէջ: Հարց է առաջանում. ի՞նչ կոթողի կամ սեան մասին է խօսքը, որը կանգնեցուել է վանքի գոյատեւման սկզբնական փուլում: Ինչպէս վերը նշեցինք, գլխատր եկեղեցու կառուցման աւարտին կանգնեցուել է գաւազան-սիւնը, այսինքն՝ վանքում կոթող կանգնեցուել է նշեալ դարաշրջանում: Չնայած նրան, որ Օրբէլեանն աւանդում է սեան անունը, որ է՝ Ս. Երրորդութիւն, այդուհանդերձ բացառուած չէ, որ քննուող վիմագիրը կարող է կապ ունենալ հենց յիշեալ կոթողի հետ կամ լինի նրա

բաղկացուցիչը, քանի որ գաազան-սեան վերնամասը եւս յարդարուած է նմանատիպ ոճաւոր գնդով, որի վրայ ագուցուած է խաչը (նկ. 3 ա, բ): Հաւանական է նաեւ, որ վիմագիրը մէկ ուրիշ կոթողի է վերաբերում, որը կանգնեցուել է ի նշան յիշեալ սրբի պաշտամունքի:



Նկ. 3 ա, բ Գաազան-սեան վերնամասը

Եթէ Ս. Պանդալեոնի անուանակիր կոթողներ այլուստ չեն արձանագրում, ապա նրա անունով յայտնի են մի քանի սրբավայրեր. Հիւսիսային Արցախի Խանլարի շրջանում, Ազատ Գիւղից 5,5 կմ. հարաւարեւմուտք, Պանդ լեռան գագաթին է գտնուում Պանդալեոնի վանք-ովստատեղին²¹: Ըստ Երուանդ Լալայեանի. «Սա հիմնուած է համանուն սարի գագաթին, որ գտնուում է Հաճիքենդի մօտ: Լեռը միայնակ, բրգաձեւ բարձրանում է մինչեւ 5000 ոտնաչափ բարձրութեան եւ գագաթին ունի մի փոքրիկ հարթ տարածութիւն: Այնտեղ, ուր այժմ կանգնած է մի փոքրիկ, հասարակ քարից շինած գմբէթաւոր մատուռ, հնումը մի մեծ վանք է եղել, բաականաչափ խցերով եւ ունեցել է միաբանութիւն: Այժմ միայն Ս. Աստուածածնի տօնին բաական մեծ բազմութիւն ուխտ է գալիս այստեղ»²²: Մակար Եպս. Բարխուդարեանցը նկատում է, որ «Վանքիս անուամբ ամբողջ սարս կոչւում է Պանդալիոնի սար, որը, կրճատելով ըստ տեղական սովորութեան, Պանդայ վանք, Պանդայ սար են անուանում»²³: Նա վկայակոչում է Ղալակա գիւղի Ս. Աստուածածին եկեղեցում պահուող ձեռագիր երկու աւետարանների յիշատակարանները, որոնցից մէկում վկայուած Անուգ-Հաւատուն-Հինգուակ գիւղը ենթադրաբար նոյնացնում է Ս. Պանդալեոնի յարակից գիւղատեղի հետ. «Գրեցաւ սուրբ Աւետարանս ձեռամբ փէժուն եւ բազմամեղ գրչի եւ սուրանուն վարդապետ Արեթէի ի գեղս Անուգ Հաւայրուն Հենգուակ, ի դուռն սուրբ եկեղեցուս մասն Պանդալիոն բժշկի եւ սրբոցն, որ աստ կան հաւաքեալ»²⁴:

Այն, որ Ս. Պանդալեոն եկեղեցում նաեւ ձեռագիր է գրուել, վկայում է Մաշտոցեան Մատենադարանի (ՄՄ) համար 3541՝ 1671 թուակիր «Աւետարան»ի գրչութեան յիշատակարանը. «... Արդ, գրեցաւ սուրբ

կենսաբեր Անգարանս թուին Հայոց ՌՃԻ. (1671) ամին, ի թագաորութեան պարսից Շահ Սուլըմանին նորընծայի եւ հայրապետութեան տանս Աղանից տեառն Պետրոսի սրբազան կաթողիկոսի, ի յերկիրս Գանջայ, ի գեղոս Համարինա ընդ հովանեաւ Սուրբ Պանդախառն բժշկի եւ Սուրբ Աստուածածնի, ձեռամբ անարժան սուրանուն Ղազար անուամբ միայն քահանայի եւ գործովս ոչ. եւ Մաթէոս եւ Մարկոս գլուխն գրեցաւ վարպետին իմոյ Ազարիայ քահանայի՝ ի խնդրոյ բարեմիւր եւ աստուածասէր հեգահոգի»²⁵: Յիշատակարանը պարզում է, որ գրիչները երկուսն են, մասնատրապէս՝ Ազարիա քահանան Համարինա գիւղի (Ելիզաւետպոլի Նահանգում ու համանուն գաւառում²⁶) Ս. Աստուածածին եկեղեցում գրել է Մատթէոսի ու Մարկոսի ատետարանները, իսկ Ղազարն այն շարունակել ու աւարտել է Ս. Պանդախտնի վանքում: Այս իրողութիւնը մեծապէս կարեւորում է սրբավայրի նշանակութիւնը, որի հիմամբ այն եւս դասուում է Արցախի գրչութեան կենտրոնների շարքը²⁷: Բացի այս, այն եղել է նաեւ նշանատու ուխտատեղի, ուր մանաւանդ Ս. Աստուածածնի Վերափոխման տօնին հաւատացեալներն ուխտի են եկել հիմնականում Գանձակ Քաղաքից ու նրա շրջակայքից²⁸: Եկեղեցին միանաւ թաղածածկ յօրինուածքով նոր շինութիւն է (նկ. 4²⁹), որն ըստ արեւմտեան մուտքի բարաւորից վեր փորագրուած ութտողանի արձանագրութեան՝ կառուցուել է 1856ին գանձակեցի Տ. Սարգիս Քին. Տէր-Ազարեանցի միջոցներով եւ նորոգուել 1896ին՝ Մկրտիչ Ա. Խրիմեան կաթողիկոսի օրօք, Մամիկոն Յովհաննէսեան Տէր Սարգսեան Տէր Ազարեանցի հոգածութեամբ.

ՍԲ ՊԱՆՏԱԼԷՈՆԻ ՄԱՏՈՒՌՍ ՇԻՆԻԵՑԱԻ 1856 Թ. / ԳԱՆՁԱԿԵՑԻ ՍԱՐԳԻՍ ՔԱՂԱՅՆԱՅ ՏԵՐ-ԱԶԱՐԵԱՆԻ ԾԱԽ/ՔՈՎ, Ի ՅԻՇԱՏԱԿ ԻՒՐ ՈՐԴԻ ՄԿՐՏՉԻ, / ՆՈՐՈԳԵՑԱԻ 1896 Թ. ՄԱՄԻԿՈՆ ՅՈՎՀԱՆՆԷՍԵԱՆ / ՏԵՐ-ՍԱՐԳՍԵԱՆ ՏԵՐ-ԱԶԱՐԵԱՆՑԻ ՀՈԳԱՅՈՂՈՒԹԵԱՆ ԵՒ ԻՒՐ ԺՈՂՈՎՐԴԻ ՕԺԱՆԴԱԿՈՒԹԵԱՄԲ, / Ի ՀԱՅՐԱՊԵՏՈՒԹԵԱՆ Տ. Տ.

ՄԿՐՏՉԻ Ա. «ՀԱՅՐԻԿ» ՍՐԲ/ԱԶՆԱԳՈՅՆ

ԿԱԹՈՂԻԿՈՍԻ ԱՄԵՆԱՅՆ ՀԱՅՈՑ³⁰

Վիմագիրը կարեւորում է այս սրբի անուանակիր եւս մէկ յիշատակմամբ:

Նշելի է նաեւ այն, որ գիւղից 2 կմ. արեւմուտք՝ Սուլունաձորի ձախ հարաւահայեաց կողմում է գտնուում Պանդախտնի մէջ քրիստոնէութիւնն արմատաւորած Երմոլայոս քահանայի անուանակիր վանքը, յայտնի նաեւ՝ Սուլունի անապատ անուամբ, որը 1987ին արդէն աներակ էր³¹:

Լալայեանը Պանդախտն բժշկի մատուտ է յիշատակում նաեւ ներկայիս ԼՂՀ Շուշիի շրջանի Կիրով Գիւղի³² արեւելեան կողմում՝ բլրի վրայ: Այստեղ ամփոփուած են նաեւ սրբի մասունքներից: Լալայեանը գրում է, որ «սա մի հասարակ, բաւական մեծ մատուտ է, որի մէջ գտնուում է Պանդախտն բժշկի գերեզմանը: Սրա տապանաքարը սկզբում մի

հասարակ կոճղ է եղել, բայց յետոյ շուշեցի Թ. Թամիրեանի ծախքով քար է ձգուած: Այս մասրան մօտ գտնուում է մի ուրիշ, շար փոքրիկ մասրուռ եւս, որի մէջ նոյնպէս մի գերեզման կայ: Ոչ մի արձանագրութիւն չկայ, միայն ժողովուրդն ասում է, թէ այդ գերեզմանը «Շահգադինն» է: Ժողովուրդը Պանփալէօն բժշկին պարոն Պիօ է կոչում եւ մեծ հաւատով վերաբերում»³³: Լալայեանի հաղորդած յիշեալ տեղեկութիւնը հիմնաւորում է մեր այն տեսակէտը, թէ Պանդալեոն սուրբը մեզանում (առաւելապէս՝ Արցախում) յատուկ պաշտամունք է ունեցել, ինչի առհաւատչեան նշեալ սրբավայրերի գոյութիւնն է:



Նկ. 4 Ս. Պանդալեոն վանք-ուխարաբեղի, 1856

Այժմ փորձենք հասկանալ, թէ ինչով էր պայմանաւորուած Ս. Պանդալեոնի պաշտամունքի՝ Հայոց Արեւելից կողմում կենտրոնացուած լինելու հանգամանքը: Այս առումով ուշագրաւ վկայութիւններ են պահպանուել հայ մատենագրութեան մէջ. Մովսէս Կաղանկատուացին իր *Պատմութիւնի* ԺԴ. գլխում տեղեկութիւններ է հաղորդում Ս. Գրիգոր Լուսաւորչի թոռ Գրիգորիսի՝ Աղուանից ու Վրաց կաթողիկոս ձեռնադրուելու, ապա նշուած վայրերում լուսաւորութիւն տարածելու մասին. «... զինգեպասան ամօք ձեռնադրեալ յեպիսկոպոսութիւն մանուկն Գրիգորիս Վրաց եւ Աղուանից աշխարհին. եւ երթեալ լուսաւորէր զերկոսին զաշխարհսն եւ հաստատէր քրիստոսական հաւատովն գնալ»³⁴: Նա իր հետ է տարել. «... զմեծ քահանայապետին եւ մարտիրոսին Զաքարիայ՝ զհօրն Յովհաննու ի պատուական արենէն նշխարս եւ սրբոյն Պանդալիոնի, որ դաւանեաց զբարիոք դաւանութիւնն Քրիստոսի եւ պսակեցաւ ի Նիկումիդիա քաղաքի»³⁵: Սրբերի մասունքների մի մասը Գրիգորիսն ամփոփում է Յրի քաղաքում (այժմ՝ ԼՂՀ Հադրութի շրջանի Յոր Գիւղ³⁶), իր կառուցած եկեղեցում. «... շինէր փոքրիկ եկեղեցի եւ դնէր անդ մեծ զգուշութեամբ մասն ինչ յարենէն Զաքարիայ եւ ի նշխարաց սրբոյն Պանդալիոնի...»³⁷: Պատմագիրը հաղորդում է, որ յիշեալ սրբերի որոշ մասունքներ դեռ Գրիգորիսի մօտ էին, երբ քրիստոնէութեան ուսմունքը տարածելիս՝ վերջինիս յանդիմանում է մասքութների թագաւոր Սանեսանը: Ենթարկուելով թագաւորի դաժանութիւններին՝ Գրիգորիսը նահատակում է Վատնեան կոչուող դաշտում (Մեծ Հայքի Փայտակարան

աշխարհի Վարդանակերտ քաղաքի մօտակայքում³⁸), իսկ նրա մարմինն աշակերտները. «... բերէին յԱմարաս գիւղաքաղաքն, որ էր ի գաւառին Հաբանդայ: Անդ եղեալ առ եկեղեցւոյն՝ հուպ ի բեմն ի հիւսիսոյ կողմանէ. եւ զսուրբ արիւնն Ջաքարիայ ի միում ապակեղէն շշի եղեալ եւ ի միւսում շշի զերանելոյն Պանդալիոնի զնշխարիս. եւ եղեալ զերկոսեան շիշսն ընդ ամենասուրբ նշխարսն մանկանն Գրիգորիսի...»³⁹: Կաղանկատուացին յիշատակում է նաեւ Աղուանից Վաչագան Բարեպաշտ թագաւորի օրօք՝ Յակոբ քահանային եւ Յրի քաղաքի կառավարիչ Խոճկորիկին յայտնուած աստուածային տեսիլքի միջոցով սրբերի մասունքների գիտը. «... գտին զնշխարս երանելեացն. եւ գիր ի վերայ տարմալոյն, յորում սուրբքն կային զայս օրինակ. «Ես Գրիգորիս բերի զայս սուրբս՝ զերջանիկն Ջաքարիա՝ զհայր Յովհաննու եւ զմեծ վկայն Քրիստոսի՝ զՊանդալիոն երանելի, որ վկայեաց ի Նիկոմիդիա քաղաքի. եւ աստեմն վախճանեցալ»»⁴⁰:

Ս. Պանդալեոնի պաշտամունքը մեծապէս կապուած էր հիւանդների բժշկութեան հետ. նրա նշխարները երկրպագելու էին զայիս ջերմողներ, բորոտներ, ուլքեր բժշկութիւն ստանալուց յետոյ հեռանում էին⁴¹: Ս. Պանդալեոնի պաշտամունքը կապուած էր նաեւ անզաւակներին զաւակ պարգեւելու, հետեւապէս՝ չբերութիւնը կանխելու հետ: Սրա վառ օրինակը Աղուանից Վաչագան թագաւորի՝ սրբերի միջնորդութեամբ Աստուծոց զաւակ պարգեւելու աղերսն էր: Կաղանկատուացին վկայում է, որ Վաչագանը. «... խնդութեամբ ընկալաւ զպարգեան ի յԱստուծոյ՝ ի ձեռն սրբոց վկայիցն: Եւ դնէր անուն մանկանն Պանդալիոն յանուն պատերազմող նահապետին Քրիստոսի Պանդալիոնի...»⁴²: Վաչագան թագաւորը սրբի անունով նաեւ մատուտ է կառուցում Դիփական Գիւղում (Մեծ Հայքի Արցախ աշխարհի Ջրաբերդ Գաւառում, այժմ՝ աներակ ու ամայի⁴³), ուր ամփոփում է նաեւ նրա մասունքներից. «... կատարեցի հիմնարկութիւն մատարանն, որ ի Դիւրական գեղջն՝ յանուն Պանդալիոնի. զի անդ փոխեալ զերանելին մեծարեցէ յոյժ»⁴⁴:

Ս. Գրիգորիսի նահատակութիւնը, նրա մասունքներն Ամարասում ամփոփելն ու Աղուանից Վաչագան թագաւորի օրօք սրբոց նշխարների գիտը յիշատակում է նաեւ Կիրակոս Գանձակեցին. «Յետոյ նշխարքն գտեալ եղեւ յաւուրս Վաչագանայ, ընդ որս եւ նշխարք սրբոցն՝ գտեալ եղեն՝ Ջաքարիայի, իորն Յովհաննու Մկրտչի, եւ Պանդալեիմոնի մեծ վկային Քրիստոսի, որ վկայեաց ի Նիկոմիդիայ քաղաքի յաւուրս Մաքսիմիանոսի, զոր տարեալ էր սուրբն Գրիգորիս ընդ իւր»⁴⁵:

Յատկանշելի են նաեւ Ս. Պանդալեոնի մասունքներն ամփոփող առարկաների վերաբերեալ մեզ յայտնի միքանի տեղեկութիւնները. Բարխուդարեանցի հաղորդմամբ՝ Գանձակի Ս. Յովհաննէս եկեղեցւում էր պահուում նաեւ. «Մասն Պանդալիոն բժշկի մի արծաթեայ, ոսկեզօծ եւ փոքր խաչի մէջ»⁴⁶, որի վրայ մակագրուած է. «Յիշատակ է Սուրբ Պանդալիոնայ եկեղեցւոյն մասունքս պահպանութիւն հասարակ

ուխտարաց եւ Տէր Սարգիս Տէր-Ազարեանցին ծախիւքն 1859 ամի»⁴⁷: Պարզում է, որ մասունքարանը եւս պատրաստուել է վերոյիշեալ Ս. Պանդալեոն եկեղեցին կառուող Տ. Սարգիս Քհն. Տէր-Ազարեանցի միջոցներով: Ս. Պանդալեոնի մասունքներից պահում են նաեւ Վարանդա Գաւառի Աւետարանոց Գիւղի Ս. Աստուածածին⁴⁸, Շուշիի Ագուլեցոց Ս. Աստուածածին⁴⁹ եկեղեցիներում, Գանձասարի Վանքում, որտեղ սրբի մասունքն անթելուած է արծաթեայ խաչի մէջ, իսկ մի տափակ ու տապանածեւ արծաթեայ զարդի վրայ մակագրուած է. «Շնորհիւ ամենազօրին կամեցաւ (հաւանաբար՝ կազմեցաւ - Ա.Հ.) մասնաւորուիս նշխարաց սրբոց Բանտալիոնի եւ Ուսանու Գրնեցոյն ձեռամբ Առաքել վարդապետի, թվ. ՌՃԾԵ. (1706)»⁵⁰: Սրբի մասունքի առկայութիւնը Գանձասարի Ս. Յովհաննէս եկեղեցում նշում է դեռեւս Կաղանկատուացին. «Այլեւ անսր է օրէնսուսոյց սուրբ ծնօտն Լուսաւորչին եւ քաջ սրբոյն Գրիգորիսի՝ զթողոյն նորին եւ զարիւն սրբոյն Զաքարիայի՝ հօրն Յովհաննու զնշխար սրբոյն Պանդալեոնի՝ մեծ վկային եւ այլ բազում սրբոց, յորոց բազում բժշկութիւնք լինին ի փառս Քրիստոսի Աստուծոյ մերոյ օրինելոյն յաւիտեան»⁵¹: Յիշեալ վկայութիւնը եւս հաւաստում է Պանդալեոն սրբի պաշտամունքը բժշկութեան հետ առնչելու իրողութիւնը:

ԺԷ. դարի ձեռագրերի յիշատակարանները վկայում են, որ Ս. Պանդալեոնի մասունքներից ամփոփուած են նաեւ Յովհաննաւանքում. ՄՄ համար 507 «Ժամագիրք ատենի» ձեռագրի նորոգման 1680 թուակիր երկարաշունչ յիշատակարանում, որի հեղինակը Զաքարիա Քանաքեոցին է, թուարկուած են վանքում ամփոփուած սրբերի անունները. «... եղեւ նորոգումն այսմ Ժամագրքի երկիրս Արարալու, ի գաւառս Անբերդու, ի հրաշափառ եւ գերահոշակ սուրբ մենաստանս ի Սիւղիվանաց, որ ստուգաբանի Յօհաննուվանք... ի դրունս մեծի Ամլորդոյն եւ երանեալ ամէնօրինեալ բերանոյն Քրիստոսի՝ Սրբոյն Յովհաննու Կարապետին եւ սուրբ աջոյն Մարթէոսի աւետարանչի եւ սուրբ Լուսաւորչին եւ Պարսամայ ճգնաւորի եւ Պանդալեոնի բժշկի եւ այլ միաեղէն սրբոցս, որք կան աստ հաւաքեալ...»⁵²: 1687ի ձեռագրի նորոգման գրեթէ նոյնաբովանդակ մէկ այլ յիշատակարան էլ պահպանուել է ՄՄ համար 1522 «Ճառընտիր» ձեռագրում՝ դարձեալ Զաքարիա Քանաքեոցու անուան յիշատակմամբ⁵³:

Յովհաննէս Եպս. Շախխաթունեանցի հաղորդմամբ՝ Ս. Պանդալեոնի մասունքներից պահում է նաեւ Մայր Աթոռ Ս. Էջմիածնում. «Խաչ փոքրիկ քառաթեւ. ի թեւսն խաչին՝ երկոքին երեսքն եւս վարդաձեւ խաւս ակամբք զարդարեալ. ի միջակիտին ի ներքոյ ապակոյն տեսանի մասն ոսկեր եւ թուղթ ի վերայ, յոր գրի. «Մասն սուրբ Պանդալեոնի»: Իսկ ի միւս երեսի՝ եղեալ է յիշատակագրութիւն, բայց եղծեալ է երկաթի գրչաւ եւ գրեալ փոխանակ «Պետրոս վարդապետ Աստուպատրի»»⁵⁴: Վերջինս, ամենայն հաւանականութեամբ, Ս. Էջմիածնի աթոռակալ Պետրոս վարդապետ

Աստապատոցին է, որը վախճանուել է 1729ին ու թաղուել Ս. Էջմիածնի միաբանական գերեզմանոցում⁵⁵:



Նկ. 5, 6 Ս. Պանդալեոնը հայ մանրանկարչության մէջ (ՄՄ ձեռ. համար 4519, 265բ, ՄՄ ձեռ. համար 1533, 480բ)

Հայաստանի Պատմության Թանգարանի եկեղեցական առարկաների հաւաքածուում պահուում է ծագումով Տաթևի Վանքից 1762ի արծաթեայ խաչ՝ ընդելուզուած գունատոր քարերով: Համաձայն մակագրութեան՝ խաչը յիշատակ է Խունդիկին, ինչպես նաեւ ղափանցի Գասպարին եւ իւր որդիներ մահտեսի Պալասանին ու Մարտիրոսին⁵⁶: Ուշագրաւն այն է, որ մակագրուած են նաեւ չորս սրբերի անուններ. «Ս(ուր)բն Հռ(ի)փս(ի)մէ, Ս(ուր)բ(ն) Ըմստին(ո)ս, Ս(ուր)բն Պ(ա)նդ(ա)լիոն, Ս(ուր)բ(ն) Յ(ո)վի(ան)ն(է)ս Մկրտ(ի)չ»⁵⁷. Խաչաթելերը, որոնցում, ըստ ամենայնի, ամփոփուած են եղել սրբերի մասունքներից, կրել են նրանց անունները: Այս վկայութիւնն ինքնին հիմնաւորում է մեր ենթադրութիւնը, թէ Տաթևում յատուկ նշանակութիւն է տրուել Պանդալեոն բժշկի պաշտամունքին, այստեղ ամփոփուած են եղել նրա մասունքներից՝ ի նշան որոնց առանձին կոթող կամ նոյնիսկ սիւն է կանգնեցուել:

Մեզ յաջողուեց Ս. Պանդալեոնին գտնել նաեւ հայ մանրանկարչութեան մէջ (ՄՄ ձեռ. համար 1533, 4519)⁵⁸: Ժամանակագորէն վաղագոյնը ՄՄ համար 4519 ձեռագիրն է՝ գրուած 1362ին Երզնկայում, Սարգիս գրչի կողմից: Ձեռագրի մանրանկարչութիւնը հիմնականում գծանկարային է՝ արտայայտուած մանուշակագոյնի տարբեր երանգներով: Պանդալեոնը պատկերուած է թերթի ձախ լուսանցում՝ ողջ հասակով, գլխին ունի լուսապսակ, իսկ ձեռքերով պահել է բացուած գլանակը (նկ. 5), որի գրութիւնները ցուցում են նրա անցած ուղին ու բժշկութեան հրաշագործութիւնները⁵⁹: Ինչ վերաբերում է ՄՄ համար 1533, Էջմիածնում՝ 1725-1730ին գրուած «Յայսմաւորք» ձեռագրին, ապա այն ունի ճոխ նկարազարդում: Ծաղկողները Յակոբ եւ Յարութիւն Յովնաթանեան եղբայրներն են, պատուիրատուները՝ Ամենայն Հայոց

կաթողիկոսներ Աստուածատուր Համադանցին ու Կարապետ Ուլնեցին կամ Զէյթունցին⁶⁰: Այս ձեռագրում Պանդալեոնը դարձեալ պատկերուած է թերթի ծախ լուսանցում՝ հասակով մէկ, պատանու տեսքով ու ոսկեգոյն լուսապսակով (նկ. 6): Հագին ունի կարմիր պարեգօտ, շագանակագոյն թիկնոց, կանաչ գօտի եւ կապոյտ ոտնամաններ: Ձախ ձեռքին դեղատուփն է, իսկ աջին՝ գդալ, որը խորհրդանշում է նրան տրուած շնորհը, ինչպէս նաեւ բոլորին օգնելու ու բժշկելու պատրաստակամութիւնը⁶¹:



Նկ. 7 Տաթեւի Վանքը հարաւ-արեւելքից

ԵԶՐԱԿԱՅՈՒԹԻՒՆ

Ամփոփելով՝ պէտք է արձանագրենք, որ Ս. Պանդալեոն բժշկի անուանակիր վիմագիրն առաջնահերթ կարեւորում է իր բովանդակային, իսկ կոթողը՝ գործառութային նշանակութեամբ: Քննութիւնը պարզում է, որ սրբի պաշտամունքը տարածուել է յատկապէս Արցախ աշխարհում՝ պայմանաւորուած Ս. Գրիգորիսի կողմից նրա մասունքներից այստեղ տեղափոխելու ու ամփոփելու իրողութեամբ: Այստեղից շատ հեռու չէր նաեւ Սիւնեաց գեղատեսիլ Տաթեւի Վանքը, որտեղ եւս, ըստ ամենայնի, ամփոփուել են սրբի մասունքներից, որի առթիւ արձանագիր կոթող կամ սիւն է կանգնեցուել: Սրա օգտին է նաեւ Տաթեւից՝ Հայաստանի Պատմութեան Թանգարան տեղափոխուած արձաթեայ խաչի սրբի անունով մակագրութիւնը:

Ս. Պանդալեոնի պաշտամունքը հիմնականում կապուած է բժշկութեան հետ, սակայն նկատեցինք, որ նա նաեւ բարեխօսում է անզաւակութեան ու չբերութեան կանխման համար: Ենթադրում ենք, որ այսօրինակ նպատակների «պաշտպանն է» կոթողը, որն ըստ վիմագրի հնագրութեան՝ կանգնեցուած պէտք է լինի Ժ.-ԺԱ. դարերում: Համաքրիստոնէական սրբի անուանակիր վիմագրի գիւղը, այն էլ հարազատ յիշեալ դարաշրջաններին, ինքնին բացառիկ է: Այն քրիստոնէայ աշխարհի ու հայ

եկեղեցու պատմության ուսումնասիրման համար նորանոր նախադրեալներ է ստեղծում:

ԾԱՆՕԹԱԳՐՈՒԹԻՒՆՆԵՐ

¹ Տաթևի վանքի վիմագրերը հրատարակուած են *Դիան Հայ Վիմագրութեան* մատենաշարի երկրորդ պրակում (93 միաւոր): Վիմագրագէտ Սեդրակ Բարխուդարեանը նախորդ հրատարակիչներից (Ստեփանոս Օրբէլեան, Յովհաննէս Շախաթունեանց, Սարգիս Զալալեանց, Ղեւոնդ Ալիշան, Երուանդ Լալայեան, Մատթէոս Փափագեանց, Կարապետ Կոստանեանց, Ալեքսանդր Երիցեան) վերցրել է նաեւ չպահպանուած արձանագրութիւնները (*Դիան Հայ Վիմագրութեան, Պրակ II, Գորիսի, Սիսիանի եւ Ղափանի Շրջաններ*, կազմեց՝ Ս. Գ. Բարխուդարեան, Երեւան, ՀՍՍՌ ԳԱ Հրատ., 1960, էջ 11-39): Պրակում օգտագործուած չէ Մեսրոպ Մագիստրոսի գիրքը, որտեղ Տաթևից ներկայացուած է 144 վիմագիր (Մեսրոպ Մագիստրոս Արք. Տէր-Մովսիսեան, *Հայկական Երեք Մեծ Վանքերի՝ Տաթևի, Հաղարծնի եւ Դադի Եկեղեցիները*, Երուսաղէմ, Տպ. Սրբոց Յակոբեանց, 1938, էջ 44-53): Վիմագրերից 45ը Մեսրոպ Մագիստրոսը հրատարակել է դեռեւս 1918ին (*Արարապ*, 1918, էջ 204-225). դրանք վերջերս վերահրատարակուել են առանձին ժողովածուում (Մեսրոպ Արք. Տէր-Մովսիսեան (Մեսրոպ Մագիստրոս), *Յօդուածների ժողովածու*, հրատարակութեան պատրաստեցին՝ Գէորգ Տէր-Վարդանեան եւ Սուսաննա Նահապետեան, Ս. Էջմիածին, Մայր Աթոռ Ս. Էջմիածնի Հրատ., 2010, էջ 279-297): Յետագայում Սիւնիքի Մարզի անտիպ արձանագրութիւնների շարքում վիմագրագէտ Սուրէն Սաղումեանը Տաթևի Վանքից եւս 23 վիմագիր է գիտական շրջանառութեան մեջ դրել՝ հաւաստելով, որ «այսքանով չի վերջանում Տաթևի վիմագրերի մասին ասելիքը. դեռեւս 3-4 տասնեակ անտիպ վաւերագրեր կան վանքի հողմահար ու գօսացած պատերին, որոնց հրապարակումը նպաստ կը բերի այս բեղմնաւոր կենտրոնի եւ համազգային պատմութեանը» (Ս. Սաղումեան, «Նորայայտ Վիմագրեր», *Լրաբեր Հասարակական Գիտութիւնների*, 2001, համար 1, էջ 100):

² Ստեփաննոս Օրբէլեան Արքեպիսկոպոս Սիւնեաց, *Պատմութիւն Նահանգին Սիսական, Թիֆլիս, Տպ. Աղանեանցի*, 1910, էջ 224. նաեւ՝ Հայր Ղեւոնդ Ալիշան, *Սիսական. Տեղագրութիւն Սիւնեաց Աշխարհի, Վենետիկ, Ս. Ղազար*, 1893, էջ 227. նաեւ՝ *Վիմական Տարեգիր. Յուցակ ժողովածոյ Արձանագրութեանց Հայոց*, կազմեաց Կ. Կոստանեանց, Ս. Պետերբուրգ, Տպ. Գիտութեանց Ճեմարանի Կայսերականի, 1913, էջ 4. նաեւ՝ Տէր-Մովսիսեան, *Հայկական Երեք Մեծ Վանքերի...*, էջ 44, արձ. 1. նաեւ՝ *Դիան Հայ Վիմագրութեան, Պրակ II*, էջ 13, արձ. 1:

³ Սիւնեաց պատմութիւնը շարադրելիս՝ Օրբէլեանն առանձին գլխով անդրադարձել է Տաթևի արդիւնաշատ եպիսկոպոս Տէր Յովհաննէսի գործունէութեանն ու կաթողիկէ եկեղեցու կառուցմանը՝ վկայակոչելով շինարարական արձանագրութիւնը. «Յամին յորում թուականն Հայոց 344 էր, եւ զպրիկն ի նաւասարդի ի 4, եւ Տէր Յովհաննէս, որ երկրորդ կարգեցայ եպիսկոպոս Սիւնեաց զկնի Տեառն Սաղոմոնի, արարի սկիզբն շինուածոյ եկեղեցոյս» (Օրբէլեան, *Պատմութիւն Նահանգին Սիսական*, էջ 224):

⁴ Գրչանկարները մերն են:

⁵ Օրբելեան, *Պարմոֆին Նահանգին Սիսական*, էջ 225:

⁶ Տէր-Մովսիսեան, *Հայկական Երեք Մեծ Վանքերի...*, էջ 45, արձ. 15. նաեւ՝ *Դիւան Հայ Վիմագրութեան*, *Պրակ II*, էջ 13, արձ. 2:

⁷ Վերջին տարիներին «Տաթևի Վերածնունդ» ծրագրի շրջանակներում պեղման ու բարեկարգման աշխատանքներ են տարում վանքում: Պեղումներն իրականացնում է ՀՀ ԳԱԱ Հնագիտութեան Եւ Ազգագրութեան Ինստիտուտի արշաւախումբը (ղեկավար՝ պ.գ.թ. Հ. Մելքոնեան, անդամներ՝ պ.գ.թ. Ա. Յարութիւնեան, Դ. Դաւթեան):

⁸ Ս. Ա. Աւագեան, *Վիմական Արձանագրութիւնների Հնչիւնաբանութիւն (X-XIV դդ.)*, Երեւան, ՀՍՍՀ ԳԱ Հրատ., 1973, էջ 301:

⁹ Նոյն, էջ 302:

¹⁰ Ստ. Մալխասեանց, *Հայերէն Բացադրական Բառարան*, *Հտր. Երրորդ*, Երեւան, ՀՍՍՌ Պետ. Հրատ., 1944, էջ 9. նաեւ՝ Հրաչեայ Աճառեան, *Հայերէն Արմատական Բառարան*, Գ. Հատոր, Երեւան, ԵՊՀ Հրատ., 1977, էջ 6. նաեւ՝ Ռ. Ղազարեան, *Գրաբարի Բառարան*, *Հտր. 2*, Երեւան, ԵՊՀ Հրատ., 2000, էջ 11-12:

¹¹ Տէր-Մովսիսեան, *Հայկական Երեք Մեծ Վանքերի...*, էջ 48, արձ. 46. նաեւ՝ *Դիւան Հայ Վիմագրութեան*, *Պրակ II*, էջ 21, արձ. 32:

¹² Համլէտ Պետրոսեան, *Խաչքար. Ծագումը, Գործառոյթը, Պատկերագրութիւնը, Իմաստաբանութիւնը*, Երեւան, Փրինթինֆօ, 2008, էջ 257-259:

¹³ Նոյն, էջ 260:

¹⁴ Հրաչեայ Աճառեան, *Հայոց Անձնանունների Բառարան*, *Հտր. Դ.*, Երեւան, ԵՊՀ Հրատ., 1948, էջ 221:

¹⁵ Շնորհք Արքեպիսկոպոս Գալուստեան, *Համաքրիստոնէական Սուրբեր*, Գ. տիպ, Երեւան, «Գանձասար», 1997, էջ 199-201:

¹⁶ Գիրք, *Որ Կոչի Այսմատուրք, Որ Պարունակէ Յինքեան Զճառս Վարուց Սրբոց...*, 1730, Տպ. Գրիգոր Դպիր Մարտրանեցի, էջ ԶԾԸ-ԶԾԸԱ: Պանդալեոն բժշկի վարքն ու վկայաբանութիւնը մանրամասն տե՛ս նաեւ՝ Հ. Մկրտիչ վարդապետ Աւգերեան, *Լիակապար Վարք Եւ Վկայաբանութիւն Սրբոց, Որք Կան Ի Հին Տօնացոցի Եկեղեցոյ Հայաստանեայց*, *Հտր. 2.*, Վենետիկ, Ս. Ղազար, 1813, էջ 488-524. նաեւ՝ *Վարք Եւ Վկայաբանութիւն Սրբոց. Հատընտիր Քաղեալք Ի Ծառնայրաց*, *Հտր. Բ.*, Վենետիկ, Ս. Ղազար, 1874, էջ 189-201:

¹⁷ Գիրք, *Որ Կոչի Այսմատուրք*, էջ ԶԾԸ:

¹⁸ Նոյն:

¹⁹ Նոյն, էջ ԶԾԸԱ:

²⁰ Նոյն:

²¹ Թ. Խ. Յակոբեան, Ստ. Տ. Մելիք-Բախշեան, Յ. Խ. Բարսեղեան, *Հայաստանի Եւ Յարակից Շրջանների Տեղանունների Բառարան*, *Հտր. 4*, Երեւան, ԵՊՀ Հրատ., 1998, էջ 301. նաեւ՝ Ստ. Մելիք-Բախշեան, *Հայոց Պաշտամունքային Վայրեր*, Երեւան, ԵՊՀ Հրատ., 2009, էջ 334:

Ս. Պանդալեոնի պաշտամունքը լայն տարածում է ունեցել նաեւ Հայաստանի սահմաններից դուրս, ինչով էլ պայմանաւորուած այս սրբի անուանակիր եկեղեցիներ կան եւրոպական ու ասիական միջանի պետութիւններում:

դրանցից է Ուկրաինայի Տեոնոպոլի Մարզի Հին Գալիչի Ս. Պանտալեյմոն եկեղեցին, որն ունեցել է նաեւ հայերէն արձանագրութիւն (*Դիւան Հայ Վիմագրութեան, Պրակ VII, Ուկրաինա, Մոլդովա*, կազմեց՝ Գ. Մ. Գրիգորեան, Երեւան, ՀՀ ԳԱԱ «Գիտութիւն» Հրատ., 1996, էջ 225): Եկեղեցիներ կան Գերմանիայի Քէյօն քաղաքում (Ժ. դար), Մակեդոնիայի Գորնո Ներեզի գիւղում (1164 թ.), Ֆրանսիայի հարաւային շրջանների վեց համայնքներում եւ այլուր, իսկ իտալական արուեստում Պանդալեոնը հանդիպում է յատկապէս որմնանկարներում, պատկերագրութիւններում (Հռոմի Սանտա Մարիա, Սան Քրիստոֆոնո եւն.), ինչպէս նաեւ Թուրքիայում, մասնաւորապէս՝ Ստամբուլում կան այս սրբի անուանակիր միքանի եկեղեցիներ (հմմտ.՝ https://en.wikipedia.org/wiki/Saint_Pantaleon):

²² Երուանդ Լալայեան, «Գանձակի Գաւառ. Նշանաւոր Վանքեր», *Ազգագրական Հանդէս*, Ե. Գիրք, համար 1, Թիֆլիս, Տպ. Կ. Մարտիրոսեանցի, 1899, էջ 347. նաեւ՝ Հ. Համազասպ Ոսկեան, *Արցախի Վանքերը*, Վիեննա, Մխիթարեան Տպարան, 1953, էջ 141-142:

²³ Մակար Եպս. Բարխուդարեանց, *Աղուանից Երկիր եւ Դրացիք: Արցախ*, Երեւան, «Գանձասար», 1999, էջ 299:

²⁴ Նոյն, էջ 110: Հեղինակը յայտնում է, որ յիշատակարանի վերջում գրիչը պարզում է, թէ գրել է Արցախի Խաչէն Գաւառի Մեծիրանից Ս. Յակոբայ վանքում:

²⁵ ՄՄ ձեռ. համար 3541, էջ 280բ-281ա:

²⁶ Թ. Խ. Յակոբեան, Ստ. Տ. Մելիք-Բախշեան, Յ. Խ. Բարսեղեան, *Հայաստանի եւ Յարակից Շրջանների Տեղանունների Բառարան*, Հտր. 3, Երեւան, ԵՊՀ Հրատ., 1991, էջ 328:

²⁷ Թ. Մինասեան, *Արցախի Գրչութեան Կենտրոնները, Ալբոմ-Ուսումնասիրութիւն*, Երեւան, «Նաիրի» Հրատ., 2015, էջ 100:

²⁸ Ս. Կարապետեան, *Հիւսիսային Արցախ*, Երեւան, ՀՀ ԳԱԱ «Գիտութիւն» Հրատ., 2004, էջ 316:

²⁹ Լուսանկարը սիրայօժար մեզ տրամադրեց յուշարձանագէտ Սամուէլ Կարապետեանը. յայտնում ենք մեր շնորհակալութիւնը:

³⁰ *Կարապետեան*, էջ 316: Հաւանաբար անտեղեակ լինելով վիմագրին՝ Բարխուդարեանցը գրում է, թէ մատուռը նորոգուել է գանձակեցի Սարգիս Քինյ. Ազարեանցի միջոցներով՝ ի յիշատակ իր վաղամեռիկ Յովհաննէս որդու, իսկ երկաթեայ դուռը յիշատակ է նոյնպէս գանձակեցի Պ. Մկրտիչ Յովհաննիսեանին (Բարխուդարեանց, էջ 299):

³¹ Կարապետեան, էջ 315:

³² Յակոբեան, Մելիք-Բախշեան, Բարսեղեան, *Հայաստանի եւ Յարակից*, Հտր. 3, էջ 533-534:

³³ Երուանդ Լալայեան, «Զանգեզուր. Նշանաւոր Վանքեր», *Ազգագրական Հանդէս*, Դ. Գիրք, Հտր. 2, Թիֆլիս, Տպ. Մ. Դ. Ռոտինեանցի եւ Կ. Մարտիրոսեանցի, 1898, էջ 49:

³⁴ Մովսէս Կաղանկատուացի, *Պատմութիւն Աղուանից Աշխարհի*, քննական բնագիրը եւ ներածութիւնը՝ Վարազ Առաքելեանի, Երեւան, ՀՍՍՀ ԳԱ Հրատ., 1983, էջ 36-37:

³⁵ Նոյն, էջ 37:

- ³⁶ Թ. Խ. Յակոբեան, Ստ. Տ. Մելիք-Բախշեան, Յ. Խ. Բարսեղեան, *Հայաստանի Եւ Յարակից Շրջանների Տեղանունների Բառարան*, Հտր. 5, Երեւան, ԵՊՀ Հրատ., 2001, էջ 163:
- ³⁷ Կաղանկատուացի, էջ 37:
- ³⁸ Յակոբեան, Մելիք-Բախշեան, Բարսեղեան, *Հայաստանի Եւ Յարակից Շրջանների Տեղանունների Բառարան*, Հտր. 4, էջ 769:
- ³⁹ Կաղանկատուացի, էջ 39:
- ⁴⁰ Նոյն, էջ 59-60:
- ⁴¹ Ա. Պանդալեոնի հրաշագործությունների մասին մանրամասն տե՛ս՝ *Սուրբ Նահապետի Եւ Բժիշկ Պանդելեիմոնի Չարչարանքները Եւ Հրաշքները*, թարգմ.՝ Արա Զոհրաբեան, Ա. Էջմիածին, Մայր Աթոռ Ս. Էջմիածնի Հրատ., 2009:
- ⁴² Կաղանկատուացի, էջ 63:
- ⁴³ Թ. Խ. Յակոբեան, Ստ. Տ. Մելիք-Բախշեան, Յ. Խ. Բարսեղեան, *Հայաստանի Եւ Յարակից Շրջանների Տեղանունների Բառարան*, Հտր. 2, Երեւան, ԵՊՀ Հրատ., 1988, էջ 128:
- ⁴⁴ Կաղանկատուացի, էջ 86:
- ⁴⁵ Կիրակոս Գանձակեցի, *Պատմություն Հայոց*, աշխ. Կ. Ա. Մելիք-Օհանջանեան, Երեւան, 1961, ՀՍՍՌ ԳԱ Հրատ., էջ 194-195:
- ⁴⁶ Բարխուտարեանց, էջ 182:
- ⁴⁷ Նոյն:
- ⁴⁸ Նոյն, էջ 209:
- ⁴⁹ Նոյն, էջ 234:
- ⁵⁰ Նոյն, էջ 251:
- ⁵¹ Կաղանկատուացի, էջ 349-350:
- ⁵² Մայր Յուզակ Հայերէն Ձեռագրաց Մաշտոցի Անուան Մատենադարանի, Հտր. Բ., կազմեցին՝ Օ. Եգանեան, Ա. Զէյթունեան, Ա. Քէօշկերեան, Երեւան, «Նաիրի» Հրատ., 2004, էջ 1049:
- ⁵³ Մայր Յուզակ Հայերէն Ձեռագրաց Մաշտոցի Անուան Մատենադարանի, Հտր. Ե., կազմեց՝ Օննիկ Եգանեան, Երեւան, «Նաիրի» Հրատ., 2009, էջ 253:
- ⁵⁴ Յովհաննէս Եպս. Շահխաթունեանց, *Սրորագրութիւն Կաթողիկէ Էջմիածնի Եւ Հինգ Գաւառացն Արարապայ*, աշխ. Ա. Տէր-Ստեփանեան, Ա. Էջմիածին, Մայր Աթոռ Ս. Էջմիածնի Հրատ., 2014, էջ 57:
- ⁵⁵ Ա. Յարութիւնեան, *Վաղարշապատ. Վանքերը Եւ Վիմական Արձանագրութիւնները*, Ա. Էջմիածին, Մայր Աթոռ Ս. Էջմիածնի Հրատ., 2016, էջ 155-156, արձ. 237:
- ⁵⁶ *Յաւրկանշական Յուզակ Թանգարանային Ժողովածուների, Պրակ 1, Հայերէն Արձանագրութեամբ Առարկաներ*, աշխ. Եգինէ Մուշեղեան, Երեւան, ՀՍՍՌ ԳԱ հրատ., 1964, էջ 85, արձ. 89ա (6849):
- ⁵⁷ Նոյն:
- ⁵⁸ Ա. Գեորգեան, *Հայ Մանրանկարիչներ. Մատենագիտութիւն (IX-XIX դդ.)*, Գահիրէ, Տպ. Նուպար 1998, էջ 482. նաեւ, նոյնի՝ *Անանուն Հայ Մանրանկարիչներ. Մատենագիտութիւն (IX-XVII դդ.)*, Գահիրէ, Տպ. Նուպար, 2005, էջ 131:

⁵⁹ А. В. Велько, *Святой Великомученик И Целитель Пантелеимон*, (Ա. Վելկո, Սուրբ մեծ նահատակ եւ բժշկարար Պանտալեիմոն), Մինսկ, Բելառուսական Ուղղափառ Թեմի Հրատ., 2010, էջ 16.

⁶⁰ Ուշագրաւ է ձեռագրի գրչութեան յիշատակարաններից մէկը. «Փառք... Արդ, այսմ աստուածունակ տառիս փափքելի տենչմամբ տէր Աստուածատուր կաթողիկոսն Ամենայն Հայոց, եւ ետ զսա գծագրել ի թուականիս մերոյ ՌՃՀԴ-ին (1725), բայց ի տոյն ամի վախճանեցաւ Աստուածատուր կաթողիկոսն, եւ մնաց գիրս այս կիսակարար, որ եւ արդեամբք եւ գոյիք տեսոն Կարապետ կաթողիկոսի Ջէթօնցոյ, զկնի յաջորդի Աստուածատուր կաթողիկոսին ի Սուրբ Աթոռն Էջմիածին, եւ վերակացութեամբ ումեմն Աղէքսանդր վարդապետի Մրգիւզի ի Կոստանդնուպօլսեցոյ, գոյնաւորեալ զանազան որակօք եւ ոսկեգօծ ծաղկօք՝ աւարտ հասեալ ի թուականիս Հայոց ՌՃՀԹ-ին (1730), մարտի Ժ. (10), ի դրան Սուրբ Էջմիածնի...» (Մայր Յուգակ, Հոր. Ե., էջ 383):

⁶¹ Велько, էջ 16:

NEWLY-FOUND EPIGRAPHIC INSCRIPTION FROM TATEV MONASTERY THAT
MENTIONS THE NAME OF ST. PANDALEON (PANTAGHION)

(Summary)

ARSEN HARUTYUNYAN
ars.vimagraget@gmail.com

The Monastery of Tatev (province of Syunik, Republic of Armenia, Tatev village) is rich in epigraphic inscriptions, some of which are still unpublished. An inscription bearing the name of Saint Pandaleon, preserved on what may be a pilaster pedestal or two parts of an obelisk base, stands out among several others and is the focus of this paper.

In this study, the author argues that the cult worship of St. Pandaleon was widespread in Artsakh. This tradition seems to have started in this area by St. Grigoris, son of St. Gregory the Illuminator. As a further proof of this widespread tradition, the author notes that relics of St. Pandaleon are preserved in several sanctuaries of Armenia (St. Etchmiatsin, Gandzasar, Hovhannavank, St. Astvatsatsin of Shushi, St. Astvatsatsin of the village of Avetaranots, etc.) He points out that St. Pandaleon is also pictured in the Armenian miniatures (Manuscripts of Matenadaran after Mesrop Mashtots, N 1533, 4519).

As the monastery of Tatev is not far from Artsakh, the paper asserts that the discovery of this inscription in Tatev indicates that the relics of St. Pandaleon were also buried in Tatev and an obelisk or monument was erected on the occasion.

